



Jumat, 17 Desember 2021
Ogen: Lukas 15:18-24



Idakep Janah Iema



Jabu ingannta erlajar, ingannta ngaloken sada ras sidebanna. Bapa ras nande me si pemena kal ngajari kerna erti kegeluhen man anak, e maka anak meteh kerna kegeluhen enda arah bapa ras nande.

I tengah-tengah jabu pe mbue ka nge banci terjadi persoalen-persoalen, la siangkan, rubat ras si debanna. banci masalah kitik tapi jadi perubaten seh maka lanai sitabehen. Pernah lit si ngatakenca maka "orang yang paling berpeluang membuat kita sakit hati adalah orang yang terdekat dengan kita" ise e? eme bapanta, nandenta, anak-anakta. Si jadi perenungen kasa kai dekahna kita la siangkan?

Sekalak anak si enggo ngelakoken salah man bapana e me arah mindo erta si langa arus ipindona man bapana. Erta e labo ipakena alu bujur tapi isia-siakenna seh keru. Kenca keru mulai me ia sadar dengen jera. Lanai itehna ku ja inganna. Mentas i bas ukurna mulihken ku bapana, labo nari jadi anak tapi jadi juak-juak. E maka mulih ia idah bapana, minter iayaki bapana, idakepna dengen iemaina, ipehagana alu erbahan kerja si mbelin. Enda me gambaren hubungan jabu si la tersirangken sada ras sidebanna. Lanai iinget-inget bapana salah anakna ndube, ialokenna anak e, sabap ergan anak e asangken kerina erta si lit. Andiko malemna ate, dengen damena sekerajangen bapa ras anak enda. Bagenda me niarapken kegeluhen jabunta. Kedamen e jadi adi lit purpur sage. Si salah ngaku salah, dengen si debanna nggit ngalemi salah dengen ngaloken ia mulihken.

Uga dage kita i tengah-tengah jabunta? Hubungenta ras anak-anakta? Idakep janah eme gambaren kekelengen si la ersibar orang tua ras anak. Kune pernah kita salah man anakta, mari alu jujur si akuken e, bage pe kune anakta lit salah lepakna mari mpebelin kekelengen. Kekelengen e maba kedamen ku bas jabunta.